

Kotavaxak dem suterot

**ALI BABA IS
BALEM-SANOY
DUBIESIK**

Reiz (9^{-eafa} dec-)

Kotava, tela tamefa golerava

KOTAVAXAK DEM SUTEROT

**ALI BABA IS
BALEM-SANOY
DUBIESIK**

Farsaf reiz (9^eafa decemda)

Kalkotavaks : **Yurani Andergan** (2014)

Reizak : Reiz ke decit-tanoy mielcek

Yunkeks : Albert Robida



Darekeon koe widava ke Farsa, tid toloye berikye yoltkirafe gu Kasim is Ali Baba. Kasim tir kulaf voxé Ali Baba tir wawafa. Ta wara va intafa blira is tela ke nazbeikeem, ko vegungafo aalxo gilanir aze va inta gaber aze ta dolera moe baroy astol vas intafa kotafa tufa ko widava remburer.

Lanvielon Ali Baba va intavaj ten gaber viele va okolikaf milk vanlakis solwir. Kivason va zolkomera va yon dubiesik, va astol jovler aze ben vaf aalap ticumar.

Okolik va int mosidad, tid balem-sanoy. Yelipokilik, va pistok poke aalap lize Ali Baba al gelber, vanlanir aze va beripeem divpakuder aze tiyar :

— Foju, va int fenkul !!

Vere, tuvel fenkuwer, drendik sunted, okilik ironokon kolanir aze tuvel moiion budewer.

Vamoion, tuvel gin fenkuwer aze balem-sanoy dubiesik divlanid. Moi sinafa farura, okilik fawokon kalir : « Foju, va int budel !!» Nume tuvel budewer.

Azon, kottan va okol rundanyar aze yelipa griawir. Kreme Ali Baba va vask bulur, va berip divpakuder nume va tuvel kosmar. Va diolaf blayak setiker :

— Foju, va int fenkul !! ~ tiyar.

Vere, tuvel fenkuwer nume Ali Baba va arulapa kotrafa gu doleks is loote moavaf talolk isu dilgavaf koe jontik leltaf eyeltap kozwir. Me aeskeson, va cug eyelt dem moava roburen gan baroy astol katanar. Moida al vajar, pune va diolatazukoy tiyar : « Foju, va int budel !!» Nume tuvel veger.

Valeafa gu ervay, Ali Baba dimdenlaniyir aze kabdue kurenik va kot eyeltcek tuvlardar nume ezbapa dem moava tigir. In djumuldines va jwa, ta beitara va sabesiki va kurenik ke Kasim kevlanir ; vexe bantel djugrupes va tela olkinda djusabena gan kurenik ke Ali Baba, va levak ke sabesiki gu cwekaf runtam storlar.



Dimdenlanison, kurenik ke Ali Baba va sabesiki mo ezba dem moava aykar aze toz uldiner. Azon va sabesiki pu ikaberik dimzilir. Taneafa tegira ke kurenik ke Kasim tir disukera va levak ke sabesiki ; nume mana akoyer a tir, wison va moavatalolk keve cwekaf runt. Ba artlanira ke Kasim, va in gu kosmara givar. Kreme in va berikye kevlanir, aze bantel, kempason va intafa tuwavanya, gu vrebaf eweem ta kolanira va arula isu divlanira kogrupedar.



Direvielon, gazdon, Kasim do astokolafa kametca vajkirafa gu koldap ta konarira va jwa, va mona bulur. « Foju, va int fenkul !!» tiyar moida va tuvel al trasir. In fenkuwer aze moi inafa kolanira budewer.

Kasim va datafa kuluca bedeyena koe bato xo enmafeler. Azon, konariyison va cug robuden eyelt dem talmoava, ta

divlanira va tuvel vanlanir, vexe va tageltaf tazukoy mea setiker nume kalir : « Olyub, va int fenkul !!»




Tuvel me fenkuwer. Kasim zo kovudapar eke va diolewa vol katrasir. Levgon va lor ke okoltcepara remgilder. Va tuvel drumlanir aze ba fenkura laizapon divlanir eke va dubies okilik trovgar ; vexe drendik iped aze va in volsaason xonukesid. Azon va vask kolud aze va kot eyelt jovleyen gan Kasim gu runda dimplekud, voxé mesonkeson da aryon tid gracaf. Azon, va awalkoda fuxebalemon gaboted aze gin segajatad.



Wori, ba miel, kurenik ke Kasim, wison da in me dimdenlanir, zo stuber nume den Ali Baba lanir. Bantel do baroy astol vere mallakir. Artlakison pok pistok, va forteykretsapa kabdue tuvel kozwir. Va dioleweem tiyar, tuvel fenkuwer aze va lipursuyuno alto ke berikye wir. Va zavzakseem ko toloy eruilt katanar aze palseson kan inta mo astol vajar. Mo toloy ar bonol va konak eyelt kotraf gu moava plekur, aze van kelda ke widava dimlanir.

Isker da kurenik va toloy astol bures va moava di basvajar aze va bareaf den ikaberikya star. Gan Morjana oblifa is dikiafa levetirikya zo emuder.



— Morjana, ~ kalir, ~ bat toloy eruilt va alto ke rinaf feliik dogid, neke soe gokotawat dumede in tuwavon al awalker.

Ina den selaxiasik vere lanir enide va lana azegama dem roti nafalafi gu jontika wupeqafa akola di seotor.

— Toktel dene rinaf feliik akoler ? ~ selaxiasik erur.

— Kaxe ! ~ ina dulzer, repalepeson, ~ tir Kasim vonaf feliik, mea pulvir, mea estur, voxé metan va inafa akolera gildar !

Direvielon, Morjana den mil selaxiasik gire lanir aze va wayot anton gizilin pu ilblisik erur. Ostik, Ali Baba is kurenik mal intafa mona kal tela ke Kasim jontikviele winon lanid, ise sinafa tila va puidapa karavar. Kle moni siel, gildeson va yona arubasa iegara ke kurenik ke Kasim is loeke Morjana batinde givasa gu awalkera ke feliik, metan zo akoyecker.

Direvanafizon, Morjana va Baba Mustafa guazaf guvengiasik digis va dolta sofenkuna abdi kotara kevlanir, aze va in den Kasim star moida moni keldacku va in al itanoker. Va

tiojexa deswar anton viele koe mawa tigid lize awalkoda ke feliik dayker.

— Baba Mustafa, ~ bam kalir, ~ va bata balemoya olkotca ta asadara pu rin al vanstá. Ampul !! Ba tenukera va baroy moavaf talolk zilití.



Ba tenukera va kobara, va kalsura va birga pu Baba Mustafa juiker, aze itanoker aze dositar liz bak pira va tiojexa al isker. Batlize, va nok deswar aze isker da guazik lanir.

Alto ke Kasim kan gubefa fiptara zo kotawar, aze arti konak viel, Ali Baba va mona ke berikye koirubar.

Viele balem-sanoy dubiesik ko vask dimlakid, volplinon zo akoyed sonkeson da alto ke Kasim al griawir ise ota ke eyelt al illaumapar.

— Dubiesik minon tigayan me tiyir antaf grunes va birga, ~ drendaf okilik kalir. ~ Acum kaiki klibura va battan, va bantan goklibut. Divulafa awalkera ke tel atayan, koe widava ape al zo katcalar, acum va kotu pridusu nisu icde mancoba

gokayestat nume va yolt ke minaf kosik is inafo yasaxo batkane di grupet. Tel ke win vajuletes va bat gedelaf lag, ede co roklatar nume va rawara va kot min co daskitir, pune va int gu awalkgakera levplekultur.

Kreme, tan drendik abdulanir ise dakter da va bata kogrupara djuprogaskuter. Va int efur aze ko widava lakir liz ba gazda kolakir. Tanoya dolta tiyir fenkuyuna, tela ke Baba Mustafa ; xuye kolur.

— Sintaik, ~ kalir, kiavayason, ~ gazdapon toz kobal... Neke rinaf iteem ape mea tir kiewackaf gu asadara !

— Levion, ~ guvengiasik dulzer, ~ va awalkik al asadá konlize afiz tiyir milaf dam revulon !

Lanes da moe joyanya tigir, dubiesik va moavatalolk divucomar aze, bulkason va in pu Baba Mustafa, bliker da in va mona bazer lize va bat awalkik al asadar.

— Vol rodekalí, ~ Baba Mustafa kalir, ~ larde lanlize moe kelda al zo itanoké ; batlizu ko mona al zo stá, azon milinde al zo dimstá.

— Terekta, ~ dubiesik dakir ; ~ do jin pil liz al zo itanokel. Silukon itanoketé, nume arse va lan moolanin rimek isu lan setiketel. Batvielu va batar moavatalolk gil !!

Baba Mustafa va zoera me rotacagir nume va dubiesik kabdu mona ke Kasim re digina gan Ali Baba star. Drendik va tcal a kan afolt ben tuvel bimulon conyukar, azon, deswason va tiojexa nokesa va iteem ke guvengiasik :


— Kas va irubasik ke bata mona grupel ?

— Koe bata revava me soké, ~ Baba Mustafa dulzer, ~ batdume me rocenká...

Dubiesik va guazik grewar aze va sint solparsad. Riwe vere, Morjana va oga ke Ali Baba divlanir. Va tcala conyukayana bene tuvel kozwir.

— Va tokcoba batcoba sugdalar ? ~ trakur. ~ Tokenide bata tcala al zo askir ? Kottode goxelkapat.

Stropackafa, va toloy ok baroy nuxackaf tuvel abdue tel ke mona ke Ali Baba isu radime, milinde is millize kan afolt tcalar. Pu feliikye is feliikya vaon me pulvir.



Miledje dubiesik va milk koe aalxo al vebidur, azon ko widava meaeskeson kolakid. Dubies okilik, nyapen gan kogrupasik, kabdu taneaf tuvel tcalayan gan Morjana artlakir.

— Batlize ! ~ bantan pu feliik kalir.

Vexe sin wan lakid enide va kona obrara me jekud, aze okilik pu intaf yelipik katcalar da balemoy ok aluboy porfef tuvel va mila tcalá dadid.



— Wori, redakik, va tanoy al tcalá ! Goxe, va in gu kotar me walwí.

Oye aptijura va bata abditegira, balem-sanoy dubiesik ko aalxo dimlakid ; fure, kogrupasik zo takagaber. Kreme artan drager da kaiki xonukesik gin lagar nume ko widava lakir.

Kotcoba milon gu taneafa toma dilizer : in va Baba Mustafa avonar nume bantel kal oga ke Ali Baba di star. Dum abdifisik, in va tuvel tcalar, vexe ika unera va afolt, kan keraf ogalt ben lerowini ki conyukar.

Dum darevielon, Morjana va mona abidedje moion divlanir, aze ba kolanira kerafa tcala va wira tazer. Ina va konak vegungaf tuvel wilupon di tcalar.

Drendafa yovara gire rodjer, nume yelipa ko aalxo bulur lize kunipayas dubiesik va mila tigara dam palik di levgar.


Yelipokilik bam gorar da miv fu kogrupar. Viele lent mona ke Ali Baba gan Baba Mustafa al zo star, pintotapon rinder eke arse pilkomodatar.



Yelipikeem koe arula va in ker. In vajger da sin va sanderdoy astokol is bar-san-anyustoya vorpa di lusted, voxē tanoya vorpa gu punta di zo tukotrar. Ko kota vlardafa vorpa ke barsan-peroya pragayana gu punta ben kevak enide metan di rovantrakur da sina tid mekotrafa, okilik va tanoy dubiesik plekur. Azon va kametca kal mona ke Ali Baba rontion star. Bantel moe intaf pikay moi sielestura va fede tagelton grivuter.

— Weltik, ~ pu ina kalir, ~ sumuon artlaní, do bat vorpeem dem punta direvielon doleten dene dolexo. Gaveckon ise me

grupé lize fu rovistalewé, nume co tí muntapaf ede va jin den
rin co djumemudel, ede efe batcoba me funer !



— Kolanil !! ~ Ali Baba meklabuson dulzer, ~ til drumbaf !

Pu tan levetirik granser da astokol di zo bravad. Azon, dirgar enide Morjana va sielestura mu emudenik di egar, aze remi estura dositar. Moi sielestura, Ali Baba ko burmotaxo lanir aze pu Morjana kalir :

— Diregazdon abdi afiz ko kolavaxe lanití. Va kiewafa lembieda mu jin egal. Ba dimlanira plekutú !

Miledje, drendokilik va kusk anjer.

— Viele ticu mawa lize vistalewé va yone ye mimatá, ~ pu kottel omapudon kalir, ~ va vorpa kan diskin wed ticutiton ludzete. Vere divlanitic...

Luxe Morjana, ina va jaftolxa ta lembieda plekur. Basskaelar viele gum tenanteyawer ; sonker da eksa dem punta tir vlardafa ise dere raki. Va abica punta kou tana vorpa ke emudenik ke feliik djukunarir.

Ko kusk lanir aze va taneafa vorpa vanlanir ; voxé zo woltendar, gildeson va puda erusa :

— Kas gemeltack ?

Morjana vofar da bata bibera va istak ke vorpa malstir ; nume zavzason wontafa, omapudon dulzer : « Volgue, men... voxé fure ! » Lente kota vorpa va mila bibera kazawar aze milinde dulzer. Kou tela ironokafa, antafa tisa kotrafa gu punta, va intaf trig guon tukotrar aze ko burmotaxo dimlanir, lanesa da feliik va bar-san-anyustoy dubiesik al ditsar.

Ina va gum anteyar aze va gadelapa narir aze ko kusk ta silukon tukotrara gu punta gire lanir. Azon va ina mo teyap rundar enide plawa kalion di lembiewer. Moion ko kota vorpa dadisa va dubiesik, va anteyasa punta gimar, batkane xonukesison teka sin va int rovorojud.



Va batcoba melorason raplekur, azon va gum tenanteyar aze kak dilk ke burmotaxo va int player enide va dilizetesa coba di dizver. Arti leu bartivamu, yelipokilik mimason va yone ye va katiyina sugdava dear. Gildeson va mek lor, ko kusk iper aze, vanlanison va vorpa, dakela ke idulafa punta is anteyane va pez vangir. In gildar da inafa tegira gire su rodjer nume kle goyater.

Ba dimlanira mal kolavaxe, Ali Baba wison va vorpeem dem punta koe kusk zo akoyeper. Morjana pu feliik va intafa tegira bak mielcek bam pwader ise gu tcala conyukayana mo tuvel kogrupedar.

— Bata kotcoba, ~ tere kalir, ~ tir skuks ke yelipa ke aalxo... Vexe va coba me gildá, toloy bewik gracad... Acum wan gorodaxal...

— Morjana, ~ Ali Baba dulzer, ~ somevulkutú da va blira pu rin danú... Nume, keson, va rin gu levetiruca tunuyá !

Pomana gan Morjana, Ali Baba arte inafa matela va kelapa suxar liz va bar-san-peroyo yelipikafo alto kotawar enide va vegungikeem me di tuobrasar. Azon, va vorpeem is ervoeem palser aze va astokoleem dene konako dolexo volmiv doler.

Wori yelipokilik va surtera vewar, nume, dimlakiyison ko arula, va yon warzaf uneten mergil modovar enide va Ali Baba di grikter. Malidirevielon ko widava dimlakir aze va int ko tedaxe vistaler liz va yoni kulafi tayi trasiyini koe intaf vask ke aalxo isu gemafa stama remburer. Azon, va dolta lente tela kerelena gan dare Kasim vox re nazbeikye ke Ali Baba, lizukedur.

Yelipokilik rozun gu Xodja Xusayn va yikye kalion toz skedar. Yaleson is ganeson dace vanyer neciaf. Nazbeikye ke Ali Baba va dolaca gonokalir. Va gadikye ruper. Battel kalir da in gojupar da do Xodja Xusayn direkielon gozar aze ba dimlanira ta sielestura den ina ganeter. In batinde askir, vexe Xusayn vewar da ta sielestura zavzagir, yontason da va kon eipkiraf burmeiks someestur.

— Xabe, ~ Ali Baba dakir, ~ adron fu kobenplekú.

Va int tsonder aze pu Morjana warzon benplekur.

Battel va mevaleuca me preyutar ise unt abdiplekur da va bate ayikye someestuse va eip grupeter. Batenide, va Abdallax levetirik ke Ali Baba ta burera va estuolk mo azega pomar nume va in nekev efuxa ve pilkomodar. Okilik ke balem-sanoy dubiesik va nubema kake vase palser.



« Re gildá dume bat jastrik va eip do feliik vol djuprogestur, va podara kobrar... Bexe, batlize tigí enide va inafa erava di tattcé !» Morjana trakur.

Va int gu stuteraf aboz vager ise va anamba kum moavayafa dilgava anam fonta webokar liz va nubema fargier. Azon, dositon gu Abdallax dem taugot, va bonta kolanir aze va konaka stutera skur. Tere, va nubema kaku anamba levimpar aze va konaka akoyepesa vola gestar, siluksilukon nujidendason va merowin disukesik.

Adim, kan taltenuba va taugot kou nubeem ke Abdallax aze va in pu Xodja atoer edje koe ronenuba va nubema gir. Xodja Xusayn va filav ixam al levimpar aze djuprofenkur viele Morjana va in ko takra gastanvepeson nubemar eke xonukera tir vulafa.



Bascualason va vage ke Xodja Xusayn, va diskina nubema pu Ali Baba nedir.

— Kas gildal, re, dume emudenik va eip do rin vol djukurestur ? Ise kas wetce in va rolaf dolesik va punta me pilkomodal, i va okilik ke balem-sanoy dubiesik ?

— Morjana, ~ Ali Baba dulzavar, ~ va gablexa bagaliafa gu rinafa kumaskira al abdiplekur : va rin gu ikanazbeik nará !

Nazbeikye ke Ali Baba va Morjana balte djuprokurer, aze vidia vanion zo fiptar.

Rolaf Xodja Xusayn ko kela ixam dogisa va alto ke inaf barsan-peroy dofugik birgon zo kotawar.

Azon, Ali Baba, ware megrupesa va bali ke toloy dubiesik tukotrayas va yelipa, va diolafa arula vol djugalanir. Neke, arti tanda, va koyara obrapason skur. Lent tuvel va int atoer aze

tiyar : « Foju, va int fenkul !!»; vere tuvel fenkuwer aze tanoya kodisukera tir umafa nume vofar da mali xonukera ke dredokilik.

Batinde, dene yasa ke Ali Baba, birga icde bata zultafa jwa veyveyon zo remgoler, nume ina is ocikeem koe tapega is wafuca tukeon di blid.